

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINSKI SUD U ŽEPČU
Broj: 44 0 K 040143 24 K
Žepče, 26.09.2024. godine.

U IME FEDERACIJE BOSNE I HERCEGOVINE!

Općinski sud u Žepču, sudija Sinanović Senad uz učešće zapisničara Mirele Maličbegović, postupajući po optužnici Kantonalnog tužilaštva ZE-DO kantona, br. T04 0 KT 0050722 23 od 03.01.2024. godine protiv optuženog S.M. , zv. „M.1 “ sin M.2 , nastanjen u ulici ... , općina Ž. , zbog produženog krivičnog djela neovlaštena proizvodnja i stavljanje u promet opojnih droga iz člana 238 stav 1 u vezi člana 55 KZ F BiH, nakon održanog usmenog i javnog glavnog pretresa, održanog dana 26.09.2024. godine , kome su prisustvovali kantonalni tužilac Kantonalnog tužilaštva ZE-DO kantona Adis Husić, optuženi S.M. i branilac optuženog Azra Močević, zaposlenica Kantonalnog zavoda za pravnu pomoć Zenica, dana 26.09.2024. godine, donio je i u prisustvu tužioca, optuženog i braniteljice optuženog i javno objavio slijedeću:

P R E S U D U

Optuženi :

S.M. , zv. „M.1“ sin M.2 i majke K. rođene T. , rođen ... godine u ... , općina Ž. , nastanjen u ulici ... , općina Ž. , pismen, sa završenom srednjom školom, po zanimanju automehaničar, neoženjen, vojsku nije služio, ne vodi se u vojnoj evidenciji, lošeg imovnog stanja, po narodnosti Bošnjak, državljanin BiH, JMB: ... , **neosuđivan**,

K R I V J E

Što je :

1. dana 20.10.2022. godine, oko 20,50 sati, u Žepču, dok se nalazio u ulici Orlovik, suprotno odredbama člana 4 stav 1, 2, 3 i 5 i člana 20 Zakona o sprečavanju i suzbijanju zloupotrebe opojnih droga u BiH, kod sebe radi dalje prodaje neovlašteno držao opojnu drogu „Amfetamin“ poznatiju kao „Speed“ u ukupnoj neto količini od 3,690 grama koja je bila razvagana i upakovana u 10 pvc paketića, koja droga je pod rednim brojem 1 liste psihotropnih tvari iz tabele II „Tvari i biljke pod strogom kontrolom“ proglašena takvom, iako je bio svjestan da je držanje opojne droge u navedene namjene zakonom zabranjeno, ali je to htio, koja droga mu je pronađena i oduzeta tog dana u navedenoj ulici od strane policijskih službenika PS Žepče,

2. dana 11.11.2022. godine, oko 17,30 sati, u Žepču, dok se nalazio u ulici Orlovik, suprotno odredbama člana 4 stav 1, 2, 3 i 5 i člana 19 i 20 Zakona o sprečavanju i suzbijanju zloupotrebe opojnih droga u BiH, kod sebe radi dalje prodaje neovlašteno držao opojnu drogu „Amfetamin“ poznatiju kao „Speed“ u ukupnoj neto količini od 11,483 grama koja je bila razvagana i upakovana u 22 pvc paketića, koja droga je pod rednim brojem 1 liste psihotropnih tvari iz tabele II „Tvari i biljke pod strogom kontrolom“ proglašena takvom, kao i opojnu drogu „Cannabis“ poznatiju kao „Marihuana“ u ukupnoj neto količini od 4,761 gram koja je bila razvagana i upakovana u 8 paketića od aluminijske folije, koja opojna droga je pod rednim brojem 13 Liste opojnih droga iz Tabele I „Zabranjene tvari i biljke“ proglašena takvom, iako je bio svjestan da je držanje opojne droge u navedene namjene zakonom zabranjeno, ali je to htio, koja droga mu je pronađena i oduzeta tog dana u navedenoj ulici od strane policijskih službenika PS Žepče,

čime je počinio produženo krivično djelo neovlaštena proizvodnja i stavljanje u promet opojnih droga iz člana 238 stav 1 u vezi člana 55 KZ F BiH.

pa ga sud na osnovu čl. 42, 43, 49 KZ FBiH te čl. 300. ZKP F BiH

O S U Đ U J E

Na kaznu zatvora u trajanju od 1 (jedne) godine.

Shodno odredbi čl. 238. stav 4. KZ F BiH, optuženom se izriče mjera sigurnosti oduzimanja predmeta: opojne droge „Amfetamin“ poznatiju kao „Speed“ u ukupnoj neto količini od 3,690 grama koja je bila razvagana i upakovana u 10 pvc paketića; opojne droge „Amfetamin“ poznatija kao „Speed“ u ukupnoj neto količini od 11,483 grama koja je bila razvagana i upakovana u 22 pvc paketića i opojna droga „Cannabis“ poznatija kao „Marihuana“ u ukupnoj neto količini od 4,761 gram koja je bila razvagana i upakovana u 8 paketića od aluminijske folije

Nalaže se PU Žepče da po pravosnažnosti ove presude dostavi na uništenje nadležnom organu: opojnu drogu „Amfetamin“ poznatija kao „Speed“ u ukupnoj neto količini od 14,3 grama i opojnu drogu „Cannabis“ poznatija kao „Marihuana“ u ukupnoj neto količini od 4,549 grama koja je preostala nakon vještačenja.

Troškovi krivičnog postupka padaju na teret budžetskih sredstava, shodno odredbi čl. 202.st.4. ZKP F BiH.

O b r a z l o ž e n j e

Kantonalno tužilaštvo ZE-DO kantona Zenica, optužnicom broj: T04 0 KT 0050722 23 od 03.01.2024. godine optužilo je S.M. , zv. „M.1 “ sin M.2 , nastanjen u ulici ... , općina Ž. , zbog produženog krivičnog djela neovlaštena proizvodnja i stavljanje u promet opojnih droga iz člana 238 stav 1 u vezi člana 55 KZ F BiH.

Optužnicu je potvrdio u cjelosti sudija za prethodno saslušanje ovog suda dana 12.01.2024. godine nakon čega je zakazao ročište za prethodno saslušanje radi izjašnjenja o krivnji.

Na ročištu za prethodno saslušanje, održanom dana 31.01.2024. godine, optuženi se izjasnio da nije kriv za krivično djelo koje mu se gore navedenom optužnicom stavlja na teret. Spis je dostavljen sudiji koji je za dan 26.09.2024. godine zakazao usmeni pretres.

Tokom usmenog pretresa optuženi se izjasnio da je kriv .

Sud je izvršio uvid u dokaze priložene uz optužnicu a radi se o sljedećim dokazima: dva nalaza i mišljenja FUP Sarajevo, Centar za forenzička ispitivanja, vještačenja i istraživanja broj: 09-18/2-03-5-2370/22 od 11.11.2023. godine i broj: 09-18/2-03-5-2362/22 od 11.11.2023. godine, zapisnik o uviđaju PS Žepče broj: 08-02-13/1-92/22 od 20.10.2022. godine, potvrda o privremenom oduzimanju predmeta PS Žepče broj: 08-02-13/1-85/22-53 od 20.10.2022. godine, zapisnik o izvršenoj radnji privremenog oduzimanja predmeta i popisu privremeno oduzetih predmeta PS Žepče broj: 08-02-13/1-85/22-53 od 20.10.2022. godine, naredba za hemijsko vještačenje Kantonalnog tužilaštva ZDK Zenica broj: T04 0 KTA 0050722 22 od 24.11.2022. godine, zapisnik o otvaranju i pregledu privremeno oduzetih predmeta i dokumentacije PS Žepče broj: 08-02-13/1-85-1/22 od 24.11.2022. godine, zapisnik o uviđaju PS Žepče broj: 08-02-13/1-109/22 od 11.11.2022. godine, potvrda o privremenom oduzimanju predmeta PS Žepče broj: 08-02-13/1-75/22-60 od 11.11.2022. godine, zapisnik o izvršenoj radnji privremenog oduzimanja predmeta i popisu privremeno oduzetih predmeta PS Žepče broj: 08-02-13/1-75/22-60 od 11.11.2022. godine, zapisnik o otvaranju i pregledu privremeno oduzetih predmeta i dokumentacije PS Žepče broj: 08-02-13/1-109/22 od 12.12.2022. godine, fotodokumentacija PS Žepče broj: 08-02-13/1 /22 od 24.11.2022. godine, fotodokumentacija PS Žepče broj: 08-02-13/1-92/22 od 20.10.2022. godine, fotodokumentacija PS Žepče broj: 08-02-13/1-109/22 od 11.11.2022. godine, fotodokumentacija PS Žepče broj: 08-02-13/1-109-1/22 od

12.12.2022. godine i izvod iz kaznene evidencije za osumnjičenog S.M. PS Žepče od 22.11.2023. godine.

U završnoj riječi tužitelj je istakao da na temelju jasnog i potpunog priznanja krivnje koje je u cjelosti potkrijepljeno predočenim dokazima tužilaštvo smatra da je u cjelosti dokazano da je optuženi S.M. počinio produženo krivično djelo za koje se tereti predmetnom optužnicom zbog čega predlaže sudu da ga oglasi krivim i kazni u skladu sa zakonom cijeneći prilikom odmjeravanja kazne njegovo priznanje kao olakšavajuću okolnost a činjenicu da se radi o produženom krivičnom djelu otežavajuću.

U završnoj riječi braniteljica optuženog je istakla da obzirom da je njen branjenik priznao krivnju za produženo krivično djelo koje mu se predmetnom optužnicom stavlja na teret predlaže sudu da to cijeni kao olakšavajuću okolnost na njegovoj strani prilikom odabira vrste i visine krivično-pravne sankcije. Predlaže sudu da ne uzme kao otežavajuću okolnost, na prijedlog tužilaštva, to što se radi o produženom krivičnom djelu iz razloga što u samoj pravnoj kvalifikaciji stoji da se radi o produženom krivičnom djelu. Predlaže sudu da njenog branjenika što blaže kazni imajući pri tom u vidu da je u vrijeme podizanja optužnice bio neosuđivana osoba pa se predlaže sudu da mu izrekne minimalnu zatvorsku kaznu te da ga oslobodi plaćanja troškova krivičnog postupka jer je nezaposlen i obzirom da je na izdržavanju kazne zatvora nema redovnih novčanih primanja iz kojih bi te troškove mogao platiti.

Da je optuženi dana 20.10.2022. godine, oko 20,50 sati, u Žepču, dok se nalazio u ulici Orlovik kod sebe radi dalje prodaje neovlašteno držao opojnu drogu „Amfetamin“ poznatiju kao „Speed“ u ukupnoj neto količini od 3,690 grama koja je bila razvagana i upakovana u 10 pvc paketića proizilazi iz zapisnika o uviđaju PS Žepče broj: 08-02-13/1-92/22 od 20.10.2022. godine u kome je navedeno da je 20.10.2022. godine u 20,50 sati u ul. Orlovik izvršeno legitimisanje od strane policije S.M. kom prilikom je isti posjedovao jednu crnu baterijsku lampu i 10 pvc prozirnih folija sa sadržajem bijele praškaste materije koja asocira na opojnu drogu "Speed" pa je izvršen uviđaj na licu mjesta, vaganje svake posebno folije i određivanje bruto težine sadržaja providne folije te je izvršeno fotografisanje lica mjesta i vaganja pojedinačnih folija, te oduzimanje predmeta a što je potvrđeno i potvrdom o privremenom oduzimanju predmeta PS Žepče broj: 08-02-13/1-85/22-53 od 20.10.2022. godine i zapisnikom o izvršenoj radnji privremenog oduzimanja predmeta i popisu privremeno oduzetih predmeta PS Žepče broj: 08-02-13/1-85/22-53 od 20.10.2022. godine u kojima je navedeno da su od optuženog oduzeta jedna crna baterijska lampica, te 10 smotuljaka prozirne pvc folije sa bijelom materijom za koje su navedene pojedinačne bruto težine. Navedene dokaze potvrđuju i fotografije iz fotodokumentacije PS Žepče broj: 08-02-13/1-92/22 od 20.10.2022. godine na kojima se vidi da je kao trag broj 1 označena baterijska lampica odložena na ulici pored ograde a kada je otvorena u istoj na mjestu gdje se ulažu baterije se nalaze pvc folije s bijelom materijom te se na fotografijama vidi vaganje svake posebno providne folije sa bijelom materijom i bruto težina istih, te da su upakovane pojedinačno u koverte za pakovanje dokaza. Da je izvršeno otvaranje i pregled privremeno oduzetih predmeta proizilazi iz zapisnik o otvaranju i pregledu privremeno oduzetih predmeta i dokumentacije PS Žepče broj: 08-02-13/1-85-1/22 od 24.11.2022. godine a što je potvrđeno i fotografijama iz fotodokumentacije PS Žepče broj: 08-02-13/1 /22 od 24.11.2022. godine na kojima se vidi da su u 11 koverata pojedinačno zapakovane baterijska lampica te svaki posebno pvc prozirni smotuljak s bijelom materijom u koverte za pakovanje dokaza te da su iste koverte potom otvorene, pregledan i vagan sadržaj istih pa da je potom u svaki koverat vraćen njen sadržaj i ponovo su zapakovane - zalijepljene trakom.

Da je provedeno vještačenje privremeno oduzetih predmeta proizilazi iz nalaza i mišljenja FUP Sarajevo, Centar za forenzička ispitivanja, vještačenja i istraživanja broj: 09-18/2-03-5-2370/22 od 11.11.2023. godine u kom nalazu i mišljenju je navedeno da je na vještačenje dostavljeno u kovertu 10 bijelih koverata u kojima su paketići s praškastom materijom te su u tabelarnom dijelu prikazane neto težine sadržaja pvc providnih paketića s bijelom praškastom materijom a čija ukupna neto masa praškaste materije je 3,690 grama, te se vještak izjasnila da ispitivana nepoznata praškasta materija sadrži psihoaktivnu komponentu amfetamin koji se nalazi na Popisu opojnih droga, psihotropnih tvari,

biljaka iz kojih se može dobiti opojna droga i prekursor Zakona o sprječavanju i suzbijanju zloupotrebe opojnih droga.

Da je optuženi dana 11.11.2022. godine, oko 17,30 sati, u Žepču, dok se nalazio u ulici Orlovik, kod sebe radi dalje prodaje neovlašteno držao opojnu drogu „Amfetamin“ poznatiju kao „Speed“ u ukupnoj neto količini od 11,483 grama koja je bila razvagana i upakovana u 22 pvc paketića, kao i opojnu drogu „Cannabis“ poznatiju kao „Marihuana“ u ukupnoj neto količini od 4,761 gram koja je bila razvagana i upakovana u 8 paketića od aluminijske folije proizilazi iz zapisnik o uviđaju PS Žepče broj: 08-02-13/1-109/22 od 11.11.2022. godine u kome je navedeno da je policija 11.11.2022. godine u 17,25 sati na lokalnom putu u ulici Orlovik, općina Žepče legitimisala S.M. koji je dobrovoljno predao jednu pvc foliju u kojoj se nalazi više manjih smotuljaka bijele praškaste materije koja izgledom asocira na opojnu drogu "Speed", jednu alu foliju u kojoj se nalazi više smotuljaka zelene biljne materije koja svojim izgledom asocira na opojnu drogu marihuanu, kao i jedan manji smotuljak alufolije u kojoj se nalazi zelena biljna materija koja svojim izgledom asocira na opojnu drogu marihuanu, te da je izvršeno oduzimanje navedenih predmeta, njihovo vaganje, te fotografisanje a što je potvrđeno i potvrdom o privremenom oduzimanju predmeta PS Žepče broj: 08-02-13/1-75/22-60 od 11.11.2022. godine i zapisnikom o izvršenoj radnji privremenog oduzimanja predmeta i popisu privremeno oduzetih predmeta PS Žepče broj: 08-02-13/1-75/22-60 od 11.11.2022. godine u kojima je navedeno da je od S.M. oduzeta pvc folija u kojoj se nalazi više smotuljaka bijele praškaste materije ukupne bruto mase 15,77 grama, kao i više smotuljaka u alu foliji u kojoj se nalazi biljna zeljasta materija bruto mase 5,90 grama, smotuljak au alufoliji u kome se nalazi više manjih smotuljaka u alufoliji u kojima se nalazi biljna zeljasta materija ukupne bruto mase 12,06 grama, te je oduzet i jedan smotuljak alufolije u kojoj se nalazi biljna zeljasta materija ukupne bruto mase 0,75 grama. Navedene dokaze potvrđuju i fotografije iz fotodokumentacije PS Žepče broj: PS Žepče broj: 08-02-13/1-109/22 od 11.11.2022. godine na kojima se vidi jedna pvc folija u kojoj se vide smotuljci i dva alu smotuljka različite veličine te je izvršeno vaganje i pakovanje navedenih smotuljaka u tri zasebne koverta za pakovanje dokaza. Da je izvršeno otvaranje i pregled privremeno oduzetih predmeta proizilazi iz zapisnik o otvaranju i pregledu privremeno oduzetih predmeta i dokumentacije PS Žepče broj: 08-02-13/1-109/22 od 12.12.2022. godine a što je potvrđeno i fotografijama iz fotodokumentacije PS Žepče broj: 08-02-13/1-109-1/22 od 12.12.2022. godine na kojima se vidi da je izvršeno otvaranje tri koverta u kojima su dokazi oduzeti od S.M. te da je izvršeno vaganje sadržaja tih koverata, to jest pvc vrećice u kojoj je pronađeno 18 manjih smotuljaka s bijelom materijom te pvc smotuljak sa četiri smotuljka u alufoliji sa sadržajem zeljaste materije; izvršeno vaganje i tragova iz koverta broj 2 i to pojedinačno bruto težine svake od 7 paketića alufolije sa zeljastom materijom te vaganje jednog smotuljka alufolije sa zeljastom materijom koji je obilježen kao trag broj 3, te je izvršeno ponovno pakovanje u iste koverta navedenih dokaza i lijepljenje koverata trakom.

Da je provedeno vještačenje privremeno oduzetih predmeta proizilazi iz nalaza i mišljenja FUP Sarajevo, Centar za forenzička ispitivanja, vještačenja i istraživanja broj: 09-18/2-03-5-2362/22 od 11.11.2023. godine u kom nalazu i mišljenju je navedeno da je na vještačenje dostavljeno koverta označena kao trag broj 1 te u njoj 22 plave koverta sa po jednim providnim pvc paketićem vezanim u čvor sa sadržajem nepoznate materije blijedo žute boje a čija ukupna neto težina praškaste materije je 11,483 grama; koverat označen kao trag broj 2 u kome su 7 plavih koverata sa po jednim alu paketićem sa sadržajem zelene biljne materije te ukupna neto težina zeljene biljne materije je 0,705 grama, te u koverti označenoj kao trag broj 3 je dostavljen 1 alufolijski paketić sa sadržajem zelene biljne materije neto mase 0,217 grama. Vještak se izjasnio da nepoznata materija blijedo žute boje upakovana u 22 paketića sadrži psihoaktivnu komponentu amfetamin a zelena biljna materija dostavljena u 8 paketića ukupne neto mase 4,761 gram sadrži psihoaktivnu komponentu Tetrahidrokanabinol (THC) u udijelu većem od Zakonom propisanog te predstavlja opojnu drogu Cannabis. Amfetamin, Tetrahidrokanabinol i Cannabis se nalaze na Popisu opojnih droga, psihotropnih tvari, biljaka iz kojih se može dobiti opojna droga i prekursor Zakona o sprječavanju i suzbijanju zloupotrebe opojnih droga. Vještak se izjasnio da se PS Žepče vraćaju količine opojne droge preostale nakon vještačenja i to Amfetamin“ poznatija kao „Speed“ u ukupnoj neto količini od 14,3 grama i opojnu drogu „Cannabis“ poznatija kao „Marihuana“ u ukupnoj neto količini od 4,549 grama.

Cijeneći priznanje optuženog i dokaze predočene od tužilaštva a koje dokaze sud prihvata obzirom da su isti logični, međusobno se dopunjavaju i potvrđuju te su potvrđeni i priznavanjem krivičnog djela od strane optuženog sud je našao dokazanim da je optuženi počinio krivično djelo i da je kriv za učinjeno krivično djelo koje mu se optužnicom stavlja na teret.

Krivično djelo neovlaštena proizvodnja i stavljanje u promet opojnih droga iz člana 238. stav 1. KZ FBiH čini ko neovlašćeno proizvodi, prerađuje, prodaje ili nudi na prodaju ili radi prodaje kupuje, drži ili prenosi ili posreduje u prodaji ili kupovini ili na drugi način neovlašćeno stavlja u promet materije ili pripravke propisom proglašene opojnim drogama a kaznit će se kaznom zatvora od jedne do deset godina.

Shodno čl. 35 KZ FBiH krivica postoji ako je počinitelj u vrijeme počinjenja krivičnog djela bio uračunljiv i pri tome postupao s umišljajem ili s nehatom ako je nehat kada je postupanje nehatno zakonom propisano za to krivično djelo.

Shodno čl. 37. KZ FBiH krivično djelo se može učiniti s direktnim ili eventualnim umišljajem. Učinitelj postupa s direktnim umišljajem kada je bio svjestan svog djela i htio njegovo učinjenje.

Da je optuženi predmetno krivično djelo počinio u dane 20.10.2022. godine i 11.11.2022. godine s direktnim umišljajem proizilazi iz činjenice da je on bio svjestan svog djela i htio njegovo izvršenje . On je bio svjestan da navedena biljna i praškasta materija koje je posjedovao kod sebe upakovane u 40 paketića a pripremljena radi prodaje predstavlja drogu i da je nedozvoljeno posjedovati radi prodaje iste ali je htio da je prodaje pa je istu upakovao u 40 paketića te držao kod sebe na ulici a koji način pakovanja, broj paketića i činjenica da su ti paketići droge kod njega pronađeni na ulici ukazuju na to da je navedene paketiće droge držao kod sebe radi dalje prodaje.

Optuženi je predmetno krivično djelo učinio u stanju uračunljivosti jer iz provedenih dokaza ne proizilazi da je u vrijeme izvršenja krivičnog djela bio neuračunljiv, smanjeno uračunljiv ili bitno smanjeno uračunljiv.

Uvidom u izvod iz kaznene evidencije od 24.11.2023. godine sud je utvrdio da optuženi nije osuđivan za krivična djela.

Za učinjeno krivično djelo sud je optuženom izrekao kaznu zatvora u trajanju od (1) jedne godine.

Utvrđenu kaznu sud je odmjerio u granicama koje su zakonom propisane za predmetno djelo, jer je za predmetno krivično djelo propisana kazna zatvora od jedne do 10 godina a imajući u vidu svrhu kažnjavanja i uzimajući u obzir sve okolnosti iz čl. 49. KZ FBiH koje utiču da kazna bude manja ili veća (olakšavajuće i otežavajuće). Prilikom odmjeravanja kazne, sud je imao u vidu svrhu kažnjavanja i sve okolnosti koje utiču da kazna bude manja ili veća (otežavajuće i olakšavajuće okolnosti), a naročito: stepen krivice, pobude iz kojih je djelo počinjeno, jačinu ugrožavanja ili povrede zaštićenog dobra, okolnosti pod kojima je djelo počinjeno, raniji život učinitelja, njegove osobne prilike i njegovo ponašanje nakon počinjenog krivičnog djela. Kao olakšavajuće okolnosti na strani optuženog sud je cijenio slijedeće: da je u cjelosti priznao krivično djelo čime je ubrzao i pojeftinio krivični postupak te da do počinjenja ovog krivičnog djela nije osuđivan za krivična djela.

Kao otežavajuću okolnost na strani optuženog sud je cijenio činjenicu da je optuženi predmetno krivično djelo počinio s dvije radnje izvršenja te da se radilo o većem broju paketića droge namjenjene prodaji kupcima i to 32 paketića speeda i 8 paketića marihuane.

Radi svega navedenog, sud smatra da se u ovom slučaju samo sa kaznom zatvora u navedenom trajanju može ostvariti svrha kažnjavanja predviđena u čl. 42. KZ FBiH i svrha krivičnih sankcija predviđena u čl. 7. KZ FBiH i da će navedena mjera kazne biti dovoljna za ostvarenje navedene svrhe.

Shodno odredbi čl. 238. stav 4. KZ F BiH, optuženom se izriče mjera sigurnosti oduzimanja predmeta: opojne droge „Amfetamin“ poznatiju kao „Speed“ u ukupnoj neto količini od 3,690 grama koja je bila razvagana i upakovana u 10 pvc paketića; opojne droge „Amfetamin“ poznatija kao „Speed“ u ukupnoj neto količini od 11,483 grama koja je bila razvagana i upakovana u 22 pvc paketića i opojna droga „Cannabis“ poznatija kao „Marihuana“ u ukupnoj neto količini od 4,761 gram koja je bila razvagana i upakovana u 8 paketića od aluminijske folije obzirom da je Zakonom propisana obaveza oduzimanja opojne droge od počinioca predmetnog krivičnog djela.

Nalaže se PU Žepče da po pravosnažnosti ove presude dostavi na uništenje nadležnom organu: opojnu drogu „Amfetamin“ poznatija kao „Speed“ u ukupnoj neto količini od 14,3 grama i opojnu drogu „Cannabis“ poznatija kao „Marihuana“ u ukupnoj neto količini od 4,549 grama koja je preostala nakon vještačenja.

Troškovi krivičnog postupka padaju na teret budžetskih sredstava, shodno odredbi čl. 202.st.4. ZKP F BiH imajući u vidu da se optuženi nalazi na izdržavanju kazne zatvora i da ne ostvaruje prihode iz kojih bi mogao podmiriti troškove krivičnog postupka.

Zapisničar
Mirela Maličbegović

S u d i j a
Sinanović Senad

POUKA: Protiv ove presude može se izjaviti žalba Kantonalnom sudu u Zenici u roku od 15 dana od prijema presude. Žalba se podnosi putem ovog suda u 3 primjerka.